

## Evening Dogri (NSD) News Bulletin

03 Jan. 2026

### आकाशवाणी

#### खास-खास खबरां

- प्रधानमंत्री नरेन्द्र मोदी होरें अज्ज नर्मी दिल्ली च महात्मा बुद्ध हुंदे पवितर अवशेशें दी विशाल अंतराष्ट्रीय प्रदर्शनी दा उदघाटन कीता।
- मोदी होरें आखेया ऐ जे महात्मा बुद्ध हुंदे अवशेश छड़ी कला-कृतियां में नेंई भारतीय सभ्यता दा अनत्रुट हिस्सा न।
- छत्तीसगढ़ च दंडु बक्ख-बक्ख टाकरे च सुरक्षाबलें 14 माओवादियें गी मारी मकाया- तेलंगाना च 20 माओवादियें पुलसै अग्गे आत्म-समर्पण करी दिता ऐ।
- चुनां आयोग नै पच्छिम बंगाल दियें त्रंडु जनजातियें बीरहोर- टोटो ते साबर गी विजन दस्तावेज पेश कीते दे मतदाता सूचियें च शामिल करने दा निर्देश दिता ऐ।
- वेनेजुएला नै अमरीकी कारवाई गी ओहदी सम्प्रभुता पर हमला करार दिंदे होई- एहदी सख्त नुक्ताचीनी कीती ऐ। रुस नै बी इसी उकसावे आहली ते आक्रमक कारवाई दस्सेया ऐ।
- भारतीय क्रिकेट कंट्रोल बोर्ड दे आखने पर कोलकाता नाइट राइडर्स नै बंगलादेशी खडारी तेज गेंदबाज मुस्तफीजुर रहमान गी अपनी टीम शा बाहर करी दिता ऐ।

- मौसम विभाग नै इस महीने दी 9 तरीक तोड़ी उत्तर भारत दे ज्यादातर हिस्सें च घनी धुंध दी चेतावनी दिंदे होई रेड-अलर्ट जारी कीता ऐ।

<><><><><><>

PM Pirpahwa

प्रधानमंत्री नरेन्द्र मोदी होरें आखेया जे भगवान बुद्ध होरें जेहड़ी ज्ञान ते शांति दी बत दस्सी ऐ ओह पूरी मनुक्खता आस्तै ऐ ते उन्दे पवित्तर अवशेष छड़े कलाकृतियां गै नैई न- सगुआं देसै दी विरासत दा हिस्सा बी ऐन। उनें आखेया जे एह अवशेष सभ्यता दा अनत्रुट हिस्सा न। मोदी होरें एह गल्ल अज्ज नमीं दिल्ली दे राय पिधौरा सांस्कृतिक परिसर च भगवान बुद्ध हुंदे पवित्तर पिपराहवा अवशेषे दी शानदार अंतराश्ट्रीय प्रदर्शनी दा उदघाटन करदे बेल्लै आक्खी। इस प्रदर्शनी दा शिर्षक ऐ- “The Light and Lotus – Relics of The Awakened One” . उनें इस प्रदर्शनी दी सूची दा बी अनावरण कीता। प्रधानमंत्री होरें आखेया जे लम्मे चिरे दे इंतजार मगरा देसै दी विरासत परतियै मुख्यै च परतोई आई ऐ- जेहड़ी सब्बनें भारतवासिये लेई संदोख ते मानै आहली गल्ल ऐ। उनें आखेया जे महात्मा बुद्ध दे संदेश भारत दे संदेश न- जेहड़े पूरी दुनिया गी रमानदारी- अमन- शांति - करुणा- दया सदभाव ते आपसी प्रेम दा संदेश दिंदे न।

<><><><><><>

Maousts Killed

छतीसगढ़ च अज्ज बस्तर प्रांतै च सुरक्षाबलें कन्नै होए दे दंऊ बक्ख-बक्ख टाकरें च 14 आतंवादी मारे गेन। इंदे चा इक टाकरा सुकमा जिले दे कौंटा इलाके च होआ- जेहदे च

सुरक्षाबलें 12 नक्सलियों दे सफाया कीता- जिसले के बीजापुर जिले दे बासागुडा इलाके च होए दे इक बक्खरे टाकरे च दंऊ आतंकवादी मारे गेन। सुरक्षाबलें टाकरे आहली दौने थाहरें दा माओवादियें दियां लोथां बरामद करी लैतियां न। टाकरे आहली थाहरें दा किश गोली-बरुद बी बरामद कीता गया ऐ जेहदे च इक ए.के.-47 ते इक SLR रफल बी शामिल ऐ। तौंआई तेलंगाना च बंदश लग्गे दे CPI माओवादी संगठन दी पीपल्स लिबरेशन गोरिला आर्मी दे बटालियन कमांडर सनें 20 माओवादियें अज्ज हैदराबाद च तेलंगाना दे पुलस महानिदेशक शिवधर रेड्डी उंदे सामने आत्म-समर्पण करी दिता ऐ। माओवादी बटालियन कमांडर बदसे सुक्का उर्फ देवा ते तेलंगाना कमेटी दे मिम्बर कंकनला राजी रेड्डी कन्नै 18 होर माओवादियें थेहार सुट्टियै अपने-आपै गी कन्नू दे हवाले करी दिता। पुलस महानिदेशक शिवधर रेड्डी होरें आखेया ऐ जे इस आत्म-समर्पण दे कन्नै गै CPI माओवादियें दा अखीरी गढ़ बी हून खत्म होई गया ऐ। माओवादियें दी बाअवादकारी लेई घोषत पैकेज तैहत पुलसै इक करोड़ 81 लक्ख 90 ज्हार रपे देने दी घोषणा कीती ऐ।

<><><><><><>

VP Temple

उपराश्ट्रपति सी.पी. राधाकृष्णन होरें अज्ज वेल्ल स्थित स्वर्ण मंदरै च मत्था टेकेया। उंदी एह यात्रा मुख पुजारिन शक्ति अम्मा हुंदे 50में जन्मदिन दे मौके उप्पर आयोजित कीती गेदी ही। अपने सम्बोधन च उपराश्ट्रपति होरें गलाया जे एह मंदर बड़ा गै खास ऐ ते देश दे दंऊ स्वर्ण मंदिरें शा इक ऐ। उनें गलाया जे एह न छड़ी पूजी दी थाह ऐ-ब्लकें जनसेवा दा केन्द्र बी ऐ। उपराश्ट्रपति होरें समाज कल्याण योजनाएं लेई

मंदिर प्रशासन दी सराहना बी कीती। इस कार्यक्रम च सूचना ते प्रसारण राज्यमंत्री डाक्टर L. Murugan ते होर दुए लीडर बी मौजूद हे। उपराष्ट्रपति हुंदे दौरै दे मद्देनजर वेल्लोर शैहर च सुरक्षा बवस्था बी निग्गर कीती गेदी ही।

<><><><><><>

Shah Phule –Tribute

केन्द्री गृहमंत्री अमित शाह होरें महिला शिक्षा ते समाजिक सुधारें दी अगुवाह सावित्री बाई फुले होरें गी अज्ज उंदी जन्म जयंति दे मौके पर भावे-भरोची शरदांजलि भेंट कीती। अपनी इक सोशल मीडिया पोस्ट च अमित शाह होरें आखेया जे सावित्री बाई फुलें होर महिलायें गी शिक्षा दे बुनियादी अधिकार कन्नै जोड़िये महिला सशक्तिकरण गी इक नमी दिशा दिती ही। उनें आखेया जे फुले होरें समाजी बुराइयें खलाफ लड़ाई लड़ी- देश दा पैहला कुड़ियें दा स्कूल बनाया ते समाजिक सुधारें दी मशाल रौशन कीती। उनें आखेया जे सावित्री बाई फुले हुंदा जीवन राष्ट्र निर्माण लेई सब्बनें गी सदा प्रेरणा दिंदा रौहग।

<><><><><><>

ECI -WB

चुना आयोग नै पच्छिम बंगाल दी खीरी मतदाता सूचि च त्रै आदम जनजातिए दा नां शामिल करने दा फैसला लैता ऐ। इनें त्रौनं समुदायें दे मतदाताएं गी एहदे लेई कोई दस्तावेज जमा कराने दी लोड़ नैई होग। पच्छिम बंगाल दे मुख चुनां अधिकारियें दे सूत्रें मुजब इनें जनजातीय च बिरहोर-टोटो ते साबर शामिल न। आयोग दे निर्देश मुजब जिला मैजिस्ट्रेटें ते जिला चुना अफसरें ब्लाक विकास अधिकारियें गी अपने-अपने इलाकें

च इनें त्रौने जनजातीय दे मतदाताएं दा ब्योरा उपलब्ध कराने लेई आक्खी दिता गया ऐ।

<><><><><><><><>

Rajnath Delhi

रक्षामंत्री राजनाथ सिंह होरें अज्ज दिल्ली विधान सभा च भारत रतन अटल बिहारी वाजपी ते पंडित मदन मोहन मालवीय हुंदी तस्वीरें परां पड़दा गोआड़ेया। इस कार्यक्रम दे दौरान रक्षामंत्री होरें “भारत माता” नां दी इक कॉफी टेबल बुक बी जारी कीती। इस मौके दिल्ली विधानसभा दे अध्यक्ष विजेन्द्र गुप्ता होर बी मजूद हे। एह कताब राश्ट्रीय गीत वंदे मातरम दी रचना दे डेढ़ सौ बरे पूरे होने दे मौके पर भारतीय राश्ट्रीय चेतना दी रचनात्मक ते कलात्मक अभिव्यक्ति गी समर्पत ऐ। राजनाथ सिंह होरें आखेया जे एह नां छड़ा इनें दंडु महान हस्तियें दे योगदान दा सम्मान करने दा मौका ऐ- सगुआं देश दी संसदीय रिवायतें- नैतिक राजनीति ते राश्ट्रवाद दी भावना गी नमन करने दा बी मौका ऐ।

<><><><><><><><>

Venezuela US Attack

वेनेजुएला च अमरीका दे हमले दी खबर दे चलदे उत्थै राश्ट्रीय इमरजेंसी घोषत करी दिती गई ऐ। राजधानी काराकस च 7 धमाकें ते गासै च मती घट्ट ऊंचाई पर उड़दे जहाजें दियां बाजां सनोचने दे बाद वेनेजुएला सरकारै अमरीका पर केंई राज्यें च फौजी ठकाने ते सिविल इलाकें पर हमलें करने दा आरोप लाया ऐ। इस्सै दौरान काराकस च धमाकें कोला पैहले जारी फौजी गतिविधियें दे चलदे उत्थू दे केन्द्री ब्लाबाजी प्राधिकरण

नै वेनेजुएला दे ब्हाई क्षेत्र च अमरीका दियें कारोबारी ब्हाई डोआरियें पर बी पाबंदी लाई दिती गेदी ऐ। कारकस च इक फौजी ठकाने दे- ज्हाज खडेरने आहले थाहर हेंगर थमां धूआं निकलदे दिक्खेया गया। उत्थै बक्ख-बक्ख इलाकें च लोकें घरें-इमारतें थमां बाहर सिडकें पर किट्ठे होई गेदे न। वेनेजुएला दे राष्ट्रपति निकोलस मादुरो होरें सब्बनं राष्ट्रीय रक्षा योजनाएं गी लागू करने दा हुकम जारी करी दिता ऐ ते देसै च इमरजेंसी दी घोषणा करी दिती दी ऐ। एह हमले ऐसे समे होए न- जिसलै अमरीका नशीले पदार्थें दी तस्करी करने आलियें किश्तियें गी नशाना बना करदी ऐ। अजें कि कल वेनेजुएला नै आखेया हा जे तस्करी दी समस्या कन्नै निबडने लेई ओ अमरीका कन्नै समझौते पर गल्लबात लेई त्यार ऐ।

<><><><><><><>

Trump Venezuela

अमरीकी राष्ट्रपति डोनाल्ड ट्रम्प होरें आखेया ऐ जे वेनेजुएला दे राष्ट्रपति निकोलस मादुरो ते उंदी घरै आहली गी फगड़ी लैता गेदा ऐ ते उनेंगी देसै थमां बाहर लेई जाया जा रदा ऐ। अमरीका नै अज्ज बड्डलै वेनेजुएला पर बड्डा हमला कीता ऐ। ट्रम्प होरें सोशल मीडिया पर इक पोस्ट च आखेया ऐ जे एह कारवाई अमरीकी कन्नू नाफस करने आहली एजेंसियें दे सहयोग कन्नै कीती गई ऐ। अज्ज बड्डलै राजधानी काराकास च केंई धमाकें दी आवाज सुनी गई ही- जेहदे पर अमरीका दी सख्त निंदेया करदे होई वेनेजुएला नै ओहदे पर गंभीर फौजी अक्रामकता दे आरोप लाए हे। तोंआई रुस नै बी अमरीकी कारवाई दी सख्त निंदेया कीती ऐ। रुस दे विदेश मंत्रालय नै आखेया जे उकसावे आहली इस कारवाई कन्नै इलाके च तनोतनी बधी सकदी ऐ- इसलेई समझदारी

संयम बरतने च ऐ। रुसी मंत्रालय दा आखना ऐ जे अमरीका आसेया इस कारवाई गी जायज ठहराने आहले तर्क बेबुनियाद न।

<><><><><><><>

Iran US Threat

अमरीका दे राष्ट्रपति डोनाल्ड ट्रम्प हुंदी चेतावनी पर इरान नै अपनी प्रतिक्रिया दिंदे होई आखेया ऐ जे अमरीका दी धमकी इक गैर जिम्मेदराना ते खतरनाक हरकत ऐ। इरान दे विदेशमंत्री सैयद अब्बास अराघची होरें आखेया ऐ जे इरान दी सेना अपनी सम्प्रभुता दी कुसै बी चाल्ली दी लोआंगना दा परता देने लेई पूरी चाल्ली त्यार ऐ। पिच्छले ऐतवार इरानी करंसी रियाल दी कीमते च भारी गिरावट दे विरोध च उत्थे बड्डे पैमाने पर हिंसक प्रदर्शन शुरु होई गे हे। ज्हारें दी गिनतरी च बपारी ते नौजवान सड़कें पर उतरी आए हे ते बड्डे पैमाने पर प्रदर्शन शुरु होई गे हे। ओहदे बाद अमरीकी राष्ट्रपति डोनाल्ड ट्रम्प होरें चेतावनी दिती ही जे जेकर इरान प्रदर्शनकारियें पर कारवाई करदा जां उंदी हत्या करदा ऐ तां अमरीका ओहदे खलाफ कारवाई करोग- जिसी इरान नै अपने अंदरुनी मामले च दखल करार दिंदे होई एहदे पर सख्त ऐतराज ऐ।

<><><><><><><>

UN Gaza

संयुक्त राष्ट्र नै गलाया ऐ जे गाजा च 10 लकख शा मते लोकें गी फौरी तौरा पर आसरमें दी लोड़ ऐ। संयुक्त राष्ट्र महासचिव दे प्रवक्ता नै गलाया ऐ जे गाजा च मानवीय सहायता सब्बनें शा कमजोर परोआरें दी मदाद करना जारी ऐ कीजे बड़ी मती

ठंडू करी लक्खां फिलिस्तीनी बरखा हवा ते समुन्द्री लेहरें शा क्षतिग्रस्त अस्थायी तम्बुयें च रौहने लेई मजबूर ना।

<><><><><><><><>

BCCI -KKR

भारतीय क्रिकेट कंट्रोल बोर्ड BCCI नै कोलकाता नाइट राइडर्स गी IPL-2026 कोला पैहले बंगलादेश दे तेज गेंदबाद मुस्त-फिजुर रहमान गी अपनी टीम शा हटाने लेई आखेया ऐ जेहदे पर अमल करदे होई KKR नै अज्ज संजा एह ऐलान करी दिता ऐ जे मुस्तफिजुर रहमान हून कोलकाता दी टीम च नैई खेडग। अजें पिच्छले महीनै गै KKR नै खडारियें दी नलामी च उसी 9 करोड़ 20 लक्ख रुपें दी बोली लाइयै अपनी टीम च शामिल कीता हा। BCCI दे सचिव देवजीत सैकिया होरें आखेया ऐ जे लोड़ पौने पर कोलकाता नाइट राइडर्स गी मुस्तफिजुर रहमान दी थाहर कोई दूए खडारी दा नां देने दी इजाजत दिती जाहग। रहमान 2026 कोला लेइयै अजें तोड़ी 8 IPL सीजन खेडी चुके दा ऐ ते छड़ा 2019 ते 2020 च ओ IPL चा बाहर रेहा हा।

<><><><><><><><>

I&B Ministry

सूचना ते प्रसारण मंत्रालय नै “बदलता भारत-मेरा अनुभव अभियान” दे तैहत चार रचनात्मक चैलेंज दे जेतुएं दी घोषणा करी दिती ऐ। एह चैलेंज माई गोव प्लेटफार्म दे सहयोग कन्नै आयोजित कीते गे हे। इंदे तैहत देशवासियें गी प्रधानमंत्री नरेन्द्र मोदी हुंदे दूरदर्शी नेतृत्व च पिच्छले 11 बरे दौरान मुख्ये च आए दे बदलावें गी दर्शानें आहले अपने व्यक्तिगत तर्जुबे सांझे करने ते सृजनात्मक विचारें गी बी सांझा करने लेई



आखेया गया हा। विकसित भारत @2047 दे नजरिए दे मताबक इस अभियान च बड़ी बद्ध गिनतरी च लोकें हिस्सा लैता। इंद्रजीत सुबोध मशांकर गी “बदलता भारत-मेरा अनुभव” इंस्टाग्राम रील प्रतियोगिता च पैहला ईनाम हासल होआ- जिसलै के मंथन रोहित गी “बदलता भारत-मेरा अनुभव” यू-ट्यूब शार्ट चैलेंज च पैहली थाहर हासल होई ऐ। एहदे इलावा शार्ट आडियो विजुअल चैलेंज च नमें भारत दी कहानी च सुशोवनमन्ना नै पैहला ईनाम जितेया ऐ जिसले कि ब्लॉग लेखन प्रतियोगिता च पैहला ईनाम कृष्णा गुप्ता नै हासल कीता ऐ। सूचना ते प्रसारण मंत्रालय नै सब्बनें जेतुएं गी ममारकबाद दिंदे होई सब्बनें प्रतिभागियें दा आभार बी प्रकट कीता ऐ।

<><><><><><><><>

#### NCC R-Day Camp

एन.सी.सी. कैडेट गणतंत्र दिवस कैम्प 2026 च मुख्य भरै थमां 2 जहार 406 एन.सी.सी. कैडेट हिस्सा लैगंन- जिंदे च 898 महिला कैडेट बी शामिल न। पिच्छले बरे दे मकाबले सब्बनें राज्यें च महिला कैडेटें दी गिनतरी च बाददा दर्ज कीता गया ऐ। अज्ज नमीं दिल्ली च इक संवाददाता सम्मेलन गी सम्बोधित करदे होई एन.सी.सी. दे Lt. Gen. Virender Vats होरें दस्सेया जे जम्मू-कश्मीर दे कन्नो-कन्नी लद्दाख थमां 127 कैडेट ते पूर्वोत्तर क्षेत्र थमां 131 कैडेट इस सलाना कैम्प च हिस्सा लै करदे न। उनें दस्सेया जे इंदे इलावा 25 मितर मुखें थमां बी कैडेट ते अधिकारी बी Youth Exchange प्रोग्राम दे तैहत इस समारोह च शिरकत करगंन। गणतंत्र दिवस परेड दे दौरान कैडेट फायरिंग ते मार्चिंग दस्ते सनें होर केंई गतिविधियें च शामिल होगंन। एह कैम्प 28 जनवरी गी प्रधानमंत्री हुंदी रैली दे कन्नै गै सम्पन्न होई जाहग। Lt. Gen.

वत्स हौरें दस्सेया जे एन.सी.सी. कैडटें दी गिनतरी मुल्यै च 17 लक्ख कोला बधियै 20 लक्ख होई गेदी ऐ- जिंदे च 40 प्रतिशत महिला कैडेट न। उनें दस्सेया जे आप्रेशन सिंदूर दे दौरान 75 जहार एन.सी.सी. कैडटें बक्ख-बक्ख चाली दियें गतिविधियें च हिस्सा लैता हा।

<><><><><><><><>

IMD Weather

भारतीय मौसम विभाग नै अज्ज दिल्ली- हरियाणा- पंजाब ते चंडीगढ़ इस महीने दी 9 तरीक तोड़ी च घने शा बड़े घने कोहरे लेई रेड- अलर्ट जारी कीता ऐ। विभाग नै हिमाचल-प्रदेश दे बक्ख-बक्ख इलाकें च ठंडू दी स्थिति ते उत्तराखंड च जमीनी सतह पर पाला पौने दी पेशगोई कीती ऐ। मौसम विभाग नै आखेया ऐ जे पूर्वी उत्तर-प्रदेश- हिमाचल -प्रदेश ते बिहार दे बक्ख-बक्ख इलाकें च सोमवारें तगर ठंड दी स्थिति बनी दी रौहग। राजधानी दिल्ली ते एहदे आहले- दोआले दे इलाकें च घनी धुंध दे चलदे केई रेलगड्डियां ते ब्हाई डोआरियां प्रभावत होइयां न।